



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim TAPAK 6

Rahul Gandhi-i Parliament nung Adani ken o benoka jembu

Amit Shah-i Tiprasa nunger taginüba mangatet: TIPRA Motha chairman



VOL. XX NO. 117 (ADOK 117) DIMAPUR RASEMNÜ (WEDNESDAY) TSÜKLAI (FEBRUARY) 08, 2023 ₹ 5.00

AAP-i Nagaland election nung shilem magitsü

Kohima, February 7, 2023 (TYO): Aam Aadmi Party (AAP)-i Nagaland assembly elections nung shilem magitsü lemtetogo.

"Candidate aikati party ticket meshiaka AAP Nagaland Unit-i Northeast in-charge AAP den asungdangtepba sülen Nagaland State Election nung official candidate meyoktsü lemtet" ta

AAP Nagaland president Asu Keyho-i ashi.

January 25, 2023 nü AAP Nagaland tenzükba sülen official candidate asütsüsa nisung shinga mengutet, ta pai ashi.

AAP Nagaland-i nütsüng bushiba mapa inyaksü anungji kasa tangatetba alirtemi AAP nung züngsem akümsü mepishir, ta Asu Keyho-isa ashi.

Nagaland Police-i garitem mita repranger

Dimapur, February 7, 2023 (TYO): Nagaland Police-i February 2, 2023 nungi state ajungalen traffic dak sendakba Special Drive ka agir.

The Motor Vehicle Act kübok gari anishirtemi tashi angatsü aser lendongtsüdong ajemba den gari mashii anishiba azüoktsü atema Nagaland Police-i iba sentong agir, ta Superintendent of Police(SCRB)& PRO, PHQ Nagaland-i sangdong ka nung metetdaksüogo.

Nagaland nung Vehicular Registration/ Registration Number shitak maliba aser AF (Applied For) garitem aika lir. Anosa, sorkar gari auction asüdong amshiba registration number memelenshii amshir aser sorkar mapa nungi anenba ketdangsurtemi sorkar meyong garitem amshir, ta Nagaland Police PRO-isa ashi.

Item ya The Motor Vehicle Act nung lateta aliba ozüngtem alema lir anungji police-i mita reprangtsü ta paisa ashi.

Congress-i tematiba jenjang nung Naga yimten olemteptsü takhangba agizük

Dimapur, February 7, 2023 (TYO): NSCN-IM aser tanga Naga yimten telok kati akhangba ama Congress-i aniba sorkartemi dang Prime Minister jenjang nung olemteptsü mulunga agizük.

"1991 küm Rajiv Gandhi-i Dimapur nung Prime Minister jenjang nung olemteptsü mulunga agizükba osang sangoktsü saka iba sülen anogo ana lir pa tepset" ta Media and Publicity Chairperson, AICC Pawan Khera-i ashi.

Iba sülen P.V. Narasimha Rao-i 1995 küm Paris nung "ni yimten latetsü amanger aser iba khuret ya yimten olemtep ajanga koktettsü. Asenoki iba khuret koktettsü atema aremzüka aser aochia atatsüla" ta Congress tebilemba nenshia metetdaksü, ta Khera-isa ashi.

Narasimha Rao-i Paris nung olemteptsü tenzükba ajanga Congress-i jenjang tematiba nung olemteptsü takhangba agizüka inyak aser tanü DAN sorkar ama masü saka Congress-ibo tatembang lemtet ka agitsü atema olemteptsü mulunga lir, ta paisa metetdaksü.

2004 nungi 2014 tashi Centre nung Congress-i aniba sorkar alidang Rio-i Consultative Committee for Peace tentet aser iba nung pa mendenbuba asü saka pai iba telokji pa sasa loksa. Pai Nagaland nung alirtem dang pa tebilemba metetdaksütsüla, ta Khera-isa ashi.

"Congress-i Nagaland nung

yimjung aginürtem asoshi bilemstür aser ochishia inyaknür. Nagaland nung alirtemi ochimashi agientsü aser Congress den ochishiba bener arutsü renema lir" ta Khera-isa ashi.

Congress-i Nagaland nung urban local bodies ajak nung tetsür nem 33% lezmüksütsü aser ita shia Rs 3,000 old age pension agütsütsü nangzükogo.

Congress-isa Eastern district tem renlokdaksütsü, MGNREGA sen 100% agütsütsü, higher education atema sen tetemlok magii loan agütsütsü aser urban & local tesemtem nung tzü tajung aser metsümeshidak agütsütsü nangzükogo.

2003 küm Congress sorkari Nagaland tia junga yutsü saka Neiphui Rio-i aniba Democratic Alliance of Nagaland sorkar ajanga sen crore meyirjang aika auyazüka agiba ajanga state nung ochimashi ken o aika adokogo, ta AICC media and publicity department chairperson Pawan Khera-i ashi.

Union home minister Amit Shah-i ano tiyazü tenangzükba ka agiogo aser ibaji elections temer 'Frontier Nagaland' indang jembitsü ta ashiba lir, ta Khera-isa ashi.

Congress-i Eastern district tem asoshi alizüng pungu adenba roadmap tajung ka shidangogo. Onoki Nagaland nung alir taginübatem kümzüka ayutsü, ta paisa ashi.

ECI-i Nagaland elections atema Special Observer 3 shimogo

Dimapur, February 7, 2023 (TYO): Election Commission of India (ECI)-i Legislative Assembly, Nagaland 2023 indang General Election atema Special Observers nisung 3 shimogo, ta Chief Electoral Officer, V. Shashank Shekhar-i ashi.

Par asem ya Special General Observer, Special Expenditure Observer aser Special Police General Observer, Police Observer

Special Observer temi Nagaland nung election maparen reprangtsü. Maneni, ECI-i General Observers 24, Expenditure Observers 24 aser Police Observers 13 tashi yoka

lir aser parnoki district 16 nung Constituency ajak reprangtsü, ta Nagaland CEO-i ashi.

ECI-i tuyuba ama election mapa lezmüka aliba ketdangsur ajaki shinga tsütsü tejak meshii aser tetsübu kecha makai inyaksangshitsü imlar. Election mapa lezmüka ketdangsur ajak ECI kübok lir aser parnoki ashiba ama inyaksüla aser aibelenertem mesüra tashi mangartem merenshitsü, ta Shashank Shekhar-isa metetdaksüogo.

Observers-i election tiptema aser ochishia agitsü atema mapa ajak nung tenük yoktsü. Assembly Election mapang parnoki senotsü endokba ajak reprangtsü, ta paisa ashi.

February 8, 2023 nü nomination papers reprangtsü aser February 10, 2023 tashi nung candidate temi tenüng meyipa agitsü akok. District Election Officer ajaki Scrutiny mapang videography asütsü atema nenshia metetdaksü, Nagaland CEO-isa ashi.

Nagaland asoshi lezmüksütsüba Special Observers:

- 1) Special Expenditure Observer - B.R Balakrishna, IRS(Retd) (IRS:1983).
- 2) Special General Observer - Ajay V. Nayak, IAS (Retd) (IAS:1984).
- 3) Special Police Observer - Anil Kumar Sharma (Retd) (IPS:1984).

Isak Sumi-i aniba NSCN/GPRN ajanga metetdaksür

Dimapur, February 7, 2023 (TYO): Naga nungeri puteptsü indang tayongzükba agütsüba tashi angaa Isak Sumi-i aniba NSCN/GPRN teloki kanga dang aremzüka president menden nung anentsür Khango Konyak dang nungi osang ka ataogo saka pa nungi telangzüba kecha mali ta Mongulbarnü NSCN/GPRN lennirtemi ashi.

Iba jagi NSCN/GPRN constitution nung aliba ama vice president Luyanba Yimkhiung-i acting President, Col. (Retd.) Isak Sumi-i Ato Kilonser aser Deputy Chief of Naga Army Pangging Konyak-i Chief of (NA) ta ser mapa tenzükogo, ta tanü NSCN/GPRN lennirtemi osangbener dang ashi.

NSCN/GPRN ya kija ka meyong masü aser constitution nung lateta aliba ama 'nisung shinga linük madak masü, nisung shinga National Socialist Council madak temaba masü' ta lennirtemisa ashi.

NSCN/GPRN(K) nungi telok balala razüka aoba ajanga tanga teloktem den memeyokteptsü atema NSCN/GPRN (K) 'Khango' ta amshi, ajisiüka Khango Konyak anentsüba sülen iba nungja ya mebeshir, ta parnokisa metetdaksü.

Naga nunger aser NNPG's indang temoatsü ma nung NSCN/GPRN-i maneni ozüng alema inyakertem talenba nungi Naga linük salatsü atema onoki inyaksü, ta NSCN/GPRN lennirtemisa ashi.

India-i Turkey menoknok nung yariteper



Mongulbarnü Indian Air Force (IAF) tayimtsü ka nung NDRF telok den osettsüset bener Turkey -i apusoa aotsü lia agiba noksa angur.

New Delhi, February 7, 2023 (TYO): Mongulbarnü Indian Air Force (IAF) C17 Globemaster tayimtsü ka Turkey tonga ogo aser ano tanga tayimtsü ka apusoa ogo.

Hombarnü Turkey nung 7.8 magnitude asadangtetba menoknok tesashi ka anokdang nisung meyirjang aika asü aser teraksa jenti bentsür arutsüogo.

Iba lendong nung yariteptsü atema India-i rescue teams, relief material, specially trained dogs aser tanga teyari balala bener yoker.

"C-17 Globemaster IAF tayimtsü ana India nungi Turkey-i ogo" ta Defence Minister Rajnath Singh-i metetdaksü.

"Tanabuba IAF C17 tayimtsü nung self-contained NDRF teams den dog squads, search & rescue equipment, extrication

tools aser garitem bener Turkey-i apusoa ogo" ta MEA spokesperson Arindam Bagchi-ia ashi.

"Türkiye nungeri teyari nungdakba mapang India-i maneni yarir" ta Bagchi-isa ashi.

Indian Army-i menoknok anokba tesem nung nübertem yaritsü atema Field Hospital ka lapokogo. Iba atema Agra nung amenoka aliba Army Field Hospital nungi züngsem 99 indang medical team ka yokogo.

Parnoki X-ray machines, ventilators, Oxygen generation plant, Cardiac monitors den yipden 30 aliba medical facility ka yanglutsü atema osettsüset bener ogo.

Hombarnü 7.8 magnitude tashi asadangtetba menoknok ajanga Turkey aser parnok kidanger Syria linük nung nisung

5,000 tema asü aser kiojen meyirjang aika chirepogo. Turkey anüdoklentip tsütsü Kahramanmaraş tiyongtsü ser menoknok anak.

"NDRF indang special search & rescue teams aser trained dog squads adenba tayimtsü Türkiye tonga aruogo. India-i yariba atema kanga pelar" ta Turkish embassy-i tanü metetdaksü.

Tesüiba nunga NDRF-i anaben tashi international operations nung yaritepogo. 2011 Japan triple disaster (earthquake, tsunami and nuclear meltdown) aser 2015 Nepal earthquake nung parnoki yaritepa liasü.

Prime Minister Narendra Modi-i akokba tashi yariteptsü ashiba sülen Centre sorkari Turkey dangi NDRF teloktem den medical aid & relief materials bener yoktsü telemtetba agia liasü.

" Yimsüsür shibai sensaker rishikangshir, paji chiyongtsü kecha meyutsüi oker aoba tzunglu mesük ". A. Shin 28:3

- Ungma Baptist Arogo Laishir Telongjem Clean Election Tayongzükba

C-Edge College nung ananü North East Japan Caravan agi



Dimapur, Tsüklai/February 07 (TYO): Nagaland nung mezüngbuba North East Japan Caravan sentong February 3 & 4, 2023 anogotem C-Edge College, Dimapur nung Japan Foundation, New Delhi den lungjemer agia liasü.

Japan Foundation nungi Aoi Ishimaru, Director of Arts & Culture Exchange aser Taisei Toyomaru, Director of Language nati anir züngsem ti arua iba anogo ananü sentong moaja liasü.

College GK Auditorium nung iba sentong February 3, 2023 anepdang tenzük, kong Daisy Shitio, Dean of Social Sciences and Humanities menden liasü aser Niya Kath, EU Advisor ajanga sarasadema liasü aser BA VI Semester nungi Selichem-i anir kaketshir kari nungtugu "We are Nagas" sayua liasü.

College tir Er. Moa Aier-i tarur pela agizükba o jembi aser Japan Foundation nungi arurtem den tepela lemsatapa

liasü. Pai ashiba agi, rongsenketzüng tsütsü lenmang lapoktsü asoshi lanu putu nem oshi tasen angazükdaktsütsü nükjidong nung College ya Japan Foundation New Delhi den tesendaktep tajung lir.

Paisa lanurtem nem tetsü oshi angazükdaktsütsü ajungshi aser College-ia sentong balala ajanga tesüiba küm pungo yamaji inyaka arur, ta ashi.

Asen oshi nung tera ayangtsü ya kanga tongtipang lir aser ano international trade and commerce dak sendakba nung Japan nung oshi ama oshioben tasen angazüksü ya tongtipang kumogo, ta pai ashi.

Iba sülen Aoi Ishimaru, Director of Arts & Culture Exchange, Japan Foundation ajanga Japan Caravan indang nung jembia liasü.

Lai Japan Caravan indang nükjidong lemsatap aser Japan Foundation indanga rateta ashi, koba alima nung Japan oshi aser sobaliba indang

prokshitsü asoshi Japan sorkar den sendaktepa lir.

North East nung iba sentong ya takok ngua agir aser telangzüba tajung arur aser ano tarutsü nunga iba amala sentong tali agitsü imlar, ta lai ashi.

Ananü Japan Caravan nungya kanga aginüa aliba Calligraphy workshop agi, kong sentong nung adener dang Japan nung oshi züluba yimya sayua liasü.

Yangji Yukata Workshop-a liasü aser yangji Japanese Kimono asemba yimyatam sayu.

Kasa sentong nung Japanese Anime Films pezü - Garden of Words, Place Promised in Our Early Days, anime 5 Centimeters per Second, aser Children Who Chase Lost Voices sayua liasü.

Kasa sentong nung Anime film aser mini game Fukuwari nung ajemdaker Voice Acting sayua liasü.

Sorkar mapa nung anener nübur tenzüktsü asoshi election nung noktaker: Toshikaba NPF Candidate



Chungtia yimtak Major Toshikaba(Retd) 28th Koridang A/C nungi tang aruya aliba 14th Nagaland Legislative Assembly election nung NPF ticket nungi tokteptsü asoshi sangdongba sentong nung jembidang tangokba noksa angur.

Chungtia, Tsüklai/February 7 (TYO) : Tanu Chungtia yimtak Major Toshikaba(Retd) 28th Koridang A/C nungi tang aruya aliba 14th Nagaland Legislative Assembly election nung NPF ticket nungi tokteptsü asoshi sangdongba sentong ka agiogo.

Iba sentong nung 28th Koridang A/C NPF candidate Major Toshikaba(Retd)-i jembidang Indian Army nung küm 22 tashi tenzükba aru aser küm 12 tashi anünga lia mapa

nungi anener election-i aitsü mulungtet ta ashi.

Pa 2023 küm june ita nungbo Lieutenant General akumtsü liasü aser pa arishi küm 50 asüandang Colonel nung sodi (retire) asütsü liasüta ashi, paisa agi nüburtemi aikati mapa tajung yutsür kechiba election nung tokteper, pension alur kelen toktepannga ashi, saka takum tebenjem mapang nung nübur tenzüktsüla aser yaritsülata asüba tangatetba nung noktaker ta ashi.

Major Toshikaba(Retd)-isa Army nung inyakbaji linuk dang tenzüktteter saka politics nung ajemoka takok ngur kelen nübur tenzükbaji kü tejangraba lirta metetdakja ashi.

Kasa sentong nung Chairman Village Council Chungtia, Senso Mungdang Chungtia, NPF Central, NPF Mkg. Division, Khensa, Aliba, Yimyu, Meküli, Kinünger, Longjongkong aser Ongpangkong Zünga Dimapur telok tenüng nungi jembiba den sentong nung Tsüng temoatsü jazüka Chungtia Baptist Arogo H/E A.Luin-isarasadem aser tatem nung tenungsang aguja Benjong Ex.Deacon-i sarasademba den Wb.Tinu Longchar-i ketdangsüa iba sentong agia liasü.

Major Toshikaba(Retd)-i 28th Koridang A/C nung BJP Candidate Wb. Imkong L.Imchen, JD(U) Candidate Wb.T.Chalukumba aser Independent Candidate Wb.Talitsüba par asem den tokteptsü.

Dimapur nung Polling Officers training Feb. 8 nü agitsü

Dimapur, Tsüklai/February 07 (TYO): Deputy Commissioner & District Election Officer, Dimapur Sachin Jaiswal, IAS ajanga sangdong ka nung ashiba agi, Presiding Officers aser First Polling Officers shirnok 1st Phase training nung maden, parnok atema training February

8, 2023 nü agitsütsü. Iba training ya mezüng session anepdang 10:00 ako nungi anüngdang 12:00 ako tashi aser tanabuba session ya nikongdang 1:00 ako nungi 3:00 ako tashi Deputy Commissioner, Dimapur indang Conference Hall nung agitsü, ta sangdong ajangasa ashi.

Kohima Police-i ozüng alema sen meshir ka apu



Dimapur, Tsüklai/February 07 (TYO): Kohima Police ajanga sangdong ka nung ashiba agi, January 5, 2023 nikongdang 7:00 ako meta

Iba osang angazükli Kohima police temi Dimapur Police teyari nung item nisungtem ya apu.

ozüng alema sen sarur südi ta temolung meleme bilemba nisung kari Guwahati leni aoba passenger bus (MN01BA-0322) driver ka Peducha bridge are nungi pua bener ao ta osang Sechü (Zubza) PS dangi aru.

Iba dak sendakba nung SS Capt. Aben Lotha (39 Yrs) of NSCN-R, Khuvito (41 yrs), Vito Yeptho (29 Yrs) aser Muile (24 Yrs) nungertem pua maneni bushisüngdangtsü atema Sechü (Zubza) PS nung ken o ka benoka lir, ta sangdong ajanga ashi.

Mokokchung nung National De Worming Day amungtsü

Dimapur, Tsüklai/February 07 (TYO): Chief Medical Officer (CMO) Mokokchung ajanga sangdong ka nung ashiba agi, National De Worming indang round mezüngbuba ta February 10, 2023 nü agitsü aser iba anogo schools aser Anganwadi sapang nung

ayongzüka agitsü. Iba sülen mop-up round ka February 17, 2023 nü agitsü. Anungji tsürabur ajungadang pei chirtem (arishi küm 1-19) pei school aser Anganwadi sapang nungi iba service agidaktsütsü ajungshir, ta sangdong ajanga ashi.



14th Nagaland Legislative Assembly 2023 asoshi aruya aliba General Election mechi Commissioner of Police, Dimapur ajanga parangbong ayokba dokan 16, Air gun ayokba dokan 5 aser prangbong yanglushiba dokan pezü February 7, 2023 nü nungi election maparen matem tashi atema shibangtsüogo.



New Delhi nung BJP Parliamentary Party senden amenba mapang Budget 2023-24 atema BJP National tir JP Nadda-i Ato Kilonser Narendra Modi nem tetushi agütsüba noksa nung angur. Union Ministers Kiren Rijju, Jyotiraditya Scindia aser Piyush Goyal nungera noksa nung angur.

India-i NDRF team, dog squad, medical crew Turkey-i yokogo

New Delhi, Tsüklai/February 7 (Agencies): Turkey aser Syria nung menoknok tesashi anokba sülen India sorkari Mongolbarnü C-17 tayimtsü ka nung search-and-rescue personnel, dog squad, mozü aser tanga relief osettem bener yokogo. External affairs minister S Jaishankar-i ashiba agi, relief osettem bener Air Force tayimtsü tanabuba aotsü renema lir.

Hombarnü 7.8 magnitude ka anokba den aftershock aikati Turkey aser kidanger Syria dak kongshiba sülen nisung 5000 shi süogo. Iba menoknok epicenter ya Turkey kübok Kahramanmaraş province nung liasü ajisüaka iba menoknok ya Egypt nung Cairo aser Greenland nunga ajangshiogo, koba km 5,500 pilar lir.

"NDRF search-and-rescue personnel 50 dak tema aser talisa specially-trained dog squads, drilling machine tem, relief osettem, mozü aser tanga tenüngdakba hadir aser osettem bener India indang C17 tayimtsü ka Adana, Türkiye tongogo," ta Jaishankar-i Mongolbar anepdang tweet asü.

"Tanabuba tayimtsü apusoa aotsü renema lir." ta paisa ashi.

Ghaziabad nung amendaker aliba team tem aser Kolkata nung team (parnok indang hadir dena) ka nungi National Disaster Response Force (NDRF) personnel 101 C-17 tayimtsü nung mener Turkey-i apusoaogo," ta NDRF ketdangsür kati PTI dang ashi.

2011 kuma Japan nung menoknok, tsunami aser nuclear dak sendakba nung lendong atalokba mapang aser 2015 kum Nepal nung menoknok anokba mapanga NDRF-i teyari agütsüogo.

Menoknok agi kongshir aliba tesemtem nung nüburtem nem medical teyari agütsüsü atema Agra-based Army Field Hospital nungi züngsem 89 Army-i anidenogo.

Iba team nung orthopaedic surgical team, general surgical specialist team, medical specialist team tem densema

critical care specialist team aser tanga medical team tem lir.

Team tem ya yipden 30 aketba medical facility ka amenoktsü atema X-ray machines, ventilators, oxygen generation plant, cardiac monitors aser tanga hadirtem teperi bena lir.

Ano India-i IAF C-17 ana Turkey-i yoktsü, kong 60 Para Field Hospital aser personnel tem densema lir, ta defence ketdangsürtemi metetdaksü.

Iba ya sorkari Hombarnü Turkey aser Syria nem teyari

agütsüsü asoshi nangzükba nung shilem ka lir. Ato Kilonser Narendra Modi indang office ajanga ketdangsürtem dang takokba tashi Turkey aser Syria nem teyari agütsüsü tetuyuba agüja liasü.

India sorkari teyari tulu agütsüba atema India dangi Turkey Ambassador Firat Sunel-i kanga pelaba lemsatepogo. United Kingdom, France, Germany aser Israel nungeria teyari

agütsüsü nangzükogo.

Rahul Gandhi-i Parliament nung Adani ken o benoka jembi

New Delhi, Tsüklai/February 7 (Agencies): Adani ken o dak sendakba nung BJP sorkar aija Congress lenir Rahul Gandhi-i, shishilembar Gautam Adani kanga takar kuma aoba ya 2014 kum Modi-i aniba sorkar kumtetba sülen nungi, ta shia liasü.

Lok Sabha nung opposition nungi mezüngbuba o jembiba mapang Rahul-i, Bharat Jodo Yatra sentong ayongzuka agiba mapang linük ajunga nung nüburtemi Gautam Adani indang jembio aser kodaser pabo ken danga tamakok mangur ta süngmanga bilemer, ta ashi.

"Kerala nungi Kashmir tashi

linük ajunga nung ni ojang ka dang angashi aji 'Adani, Adani, Adani'. Iba nisungba indang nüburtemi asüngdangba mapang, parnoki kodaser pabo mapa ajak nung takok angur aser kodanga tamakok mangur aji metetnua asüngdanga liasü," ta pai ashi.

Paisa, lanurtemi kodaser iba shishilembar indang rongsen ya 2014 aser 2022 kum tsüngda USD billion 8 aliba nungi USD billion 140 akum ta süngmanger, ta ashi.

Ato Kilonser aija Rahul-i, capitalism aser kar nem alia maongka agütsüba indang jembia liasü.

Rajnath Singh-i ayongzuka Defence Ministers' Conclave akatsü

New Delhi, Tsüklai/February 7 (Agencies): Bengaluru nung 14buba Aero India sentong agiba mapang Defence Minister Rajnath Singh-i ayongzuka 'Defence Ministers' Conclave' akatsü.

Küm ana nung ken agiba iba air show ya Yelahanka kübok Air Force Station nung February 13 nungi 17 tashi agitsü.

Iba conclave nung bendanger tembar linüktem nungi Defence Ministers temi shilem agitsü, shirnok Aero India sentong nung shilem agitsü renema lir, ta official sangdong ka ajanga metetdaksü.

Iba conclave nung, capacity building (through investments, R&D, joint venture, co-development, co-production and provisioning of defence equipment) dak sendakba nung tesendaktep akangshitsü, training, space, AI aser maritime security dak sendakba onük balala benoka sensak asemtsü koba 'Shared Prosperity through Enhanced Engagements in Defence' (SPEED) omen nung ajemdaker külemi renloka aotsü atema lir.

Ato Kilonser nükjidong 'Make in India, Make for the World' tejakdangi bener aotsü

atema Defence Minister tem kati ka den sendakteptsü atema iba conclave ya maongka tajung ka asütsü.

Ketdangsürtemi ashiba agi, Aero India ya alima nung aerospace exhibitions tulutiba rongnung ka lir aser 1996 kum nungi tenzuka tang tashi nung Bengaluru nung iba sentong 13 benbo kanga takok ngua ayongzuka agiogo.

Taküm iba sentong nung shilem agitsü atema exhibitor 731 züngoksema lir, kong India nungi 633 aser bendanger 98 densema lir.

Ato Kilonser Narendra Modi-i Defence sector atema 'Aatmanirbhar Bharat' (self-reliant India) campaign amenoktsüogo ta ashiba den self-sufficient defence ecosystem terenlok asoshi indigenous defence manufacturing aser production capability ajungkettsü nükjidong lir.

Kasa sangdong ajangsa, indigenous industry renloka aotsü atema linük nung tenüngdakba kija agi peritsü, ajisüaka India-i Defence production jenjang tasen kati ajungkettsü aser terenlok asoshi mulungajemba linüktem den longjemmer inyakner, ta ashi.

Bank of Baroda बैंक ऑफ बरौदा

NAGA BAZAR BRANCH
P. B. No. 8, Naga Bazar, Main Road, Kohima, Nagaland- 797001
Email: vjkohi@bankofbaroda.co.in

[Rule 8(1)]
POSSESSION NOTICE (For Immovable Property)
Securitization and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002, Section 13 (12) Rule 8 kübok Bank of Baroda Naga Bazar Branch, indang Authorized Officer ka ama **20.01.2022** nü sen apur **Mr. P. Imti Phom, S/o Pongau Phom** dang pai apuba sen **Rs. 50,24,532.00 (Fifty Lacs Twenty Four Thousand Five Hundred Thirty Two only)** iba osang agizükba sülen anogo 60 tsüngda aotsü metetdaksür
Sen apuri sentsüh maotet asünung sen apur aser nüburtem dang Act kübok Section 13, sub section (4) aser Security Interest (Enforcement) Rules 2002 kübok Rule 8 nung tashi agüja aliba dak ajemdaker **2023 kum February 4** nü teküboklen agüja aliba kiojen/ali agiba metetdaksür.
Sen apur aser nüburtem dang teküboklen agüja aliba kiojen/ali dang sendakba nung kecha inyaksangshi masütsü metetdaksür, ajita mesüra Bank of Baroda-i sentsüh **Rs. 50,24,532.00 (Fifty Lacs Twenty Four Thousand Five Hundred Thirty Two only)** aser tetemlok aser tanga charges tem meshitsü.
Sen apur dang Section 13 kübok sub-section (8) dak ajemdaker atakzükja aliba mapang kiojen/ali meyipa agitsü jaoker.

Kiojen osang tejangja:

Item No.	Land description	Extent/Areas of Land	Location	Boundary
1.	Land and Buiding having Patta No-173, Dag No- 328, House No.- Y, B. H- 51, Lane- 4, Imkolendlen colony, Naharbari Village A.K, Dimapur	14400 Sq. mt.	Mouza No.-3, Imkolenden Colony, Naharbari, Village- A.K, Dimapur	North- Plot of Mr. Tarep Ao South- Approach Road East- Plot of Mrs. Watisenla West- Plot of Rev Sosangmeraeen

Date: 04.02.2023
Place: Kohima

Authorised Officer
Bank of Baroda, Naga Bazar Branch

SBI State Bank of India
STRESSED ASSETS RECOVERY BRANCH, JORHAT
Na-Ali, M G Road, Jorhat, Opp. ASEB Building, PIN-785001 (Assam)
Tel No : 0376-2300193 / 2300204

[Rule - 8(1)]
KIOJEN AGIBA NOTICE
Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba State Bank of India officer-i 10.05.2021 anogo nung Demand Notice ka ajanga sen apur **Smt. Aneile Venuh, Proprietor of M/s. A. N. Hardware aser Shri Ngore Sekhmo, Guarantor of M/s. A. N. Hardware** dang notice anguba anogo nungi tenzuka anogo 60 tsüngda notice nung shia aliba **Rs. 27,26,543.00 (Rupees Twenty Seven Lakhs Twenty Six Thousands Five Hundred Forty Three only)** agüjang, ta tuyua liasü.
Ajisüaka sen apuri seni magütsütet nung sen apur/Guarantor aser nüburtem dang tsünglanglen sign süa aliri iba Act kübok Section 13(4) aser Rule 8 nung agüja aliba tashi amshia 2023 kum February 2 nü tsünglanglen shia aliba kiojen agiadokogo, ta sangdonger.
Sen apur/Guarantor aser nüburtem dang iba kiojen dak sendakba nung kecha inyaksangshi masütsü metetdaksür aser kari danga tetuyuba anema inyakra State Bank of India-i Rs. 27,26,543.00 (Rupees Twenty Seven Lakhs Twenty Six Thousands Five Hundred Forty Three only) den 11.05.2021 anogo nungi tenzuka tetemlok meshitsü.
Sen apur dang iba Act nung Section 13 kübok sub-section (8) nung aliba ama mapang shidak nung item kiojen alanzüktsü atema inyaksü metetdaksür.

Kiojen osang tejangja:
Mouza No: 01, Block No. 11, Burma Camp, Dimapur, Nagaland nung Smt Aneile Venuh tenüng nung aliba Dag No. 720 of Patta No. 578-i ayimjema aliba 00 Bigha 03 Katha 13 Lechas kimong aser RCC kiojen ajak.
All that part and parcel of the property consisting of a plot of land measuring total area of 00 Bigha 03 Katha 13 Lechas covered by Dag No. 720 of Patta No. 578 along with a RCC building situated at Mouza No: 01, Block No. 11, Burma Camp, Dimapur, Nagaland in the name of Smt Aneile Venuh.
Bounded:
On the North by : Land of Ao, On the South by : Main Road,
On the East by : Lima, On the West by : Approach Road.
DATE : 02.02.2023
PLACE : Dimapur
AUTHORISED OFFICER
(State Bank of India, SARB Jorhat Branch)



TIR YIMYIM YIMOBILEM (EDITORIAL)

DIMAPUR RASEMNÜ, TSÜKLAI (FEBRUARY) 08, 2022

Election nung ayoktsübatem

Alima nung nisungtemi ayongba sentong shia nung kar atema teindoker aser kar atema tebdener, kar atema takoksa saka kar atemabo tajangzük ta asütsüsa tensa mapangi bener arur. Aji oda, mozü ayoker asoshibo shiranger aliba agiang tajangzük angur. Kasaji kari benjong ayongzük nung dang osettsüset aser chiyongtsü ayokertem tajangzük angur. Iba amaji, tang ama election mapang tesem ajaklen vote mayoktsü indang jembidang, süra kechisa ayoktsüla ta asenoki bilemdanga inyaktü junger. Atangji, election ya tanga lokti senden adenshia chiyongtepa amongba benjong ka masü saka ibaia yimten benjong ka lir, kechiyong election mapang tepiyong tesem tesem nung telok telok adenshia yimten aser loktiliba ajungtsü atema ken o tapu balala benoka jembitsü aser sentong ali shia chiyongtsü. Aji oda, lokti mapa nung lokti jajar aser lokti adenshir asünungji sen endoktsü nungdak maparen aika adoker. Item nungdaktemji asenoki jelia reprangtetadoker ayoktsü asoshi renema atatsübatem kanga tajangzük keta inyaktüba mapa ka lir. Asenoki aiben 'business' inyaktüba ya nübortem kechi nungdakem ta repringer ayoker masü, saka tangari kechi ayoker ta asüba jilu ajizüka ayoker. Ibayongji, aiben asenoki tangar den metoktepteti takoksa ngur anener. Atangji, election mapang ya talangka masü, ita ka shi dang aser iba mapang lokti asoshi nungdakbatemji party flag tulu aser tila nungi shir metsü - mersü, shini - mamatzü, süngojok, jangotsü, süngotsü, auso aser marok aser shi anga aika nungdaktsü. Item ajakji asenoki bener arua yoktettsü. Talisa asen lima nung election mapang lijaliongba maparen nung sen teimtiba endokbaji ak shi nung endoka alitsü südi. Itemji kodang asenoki sükdangdir, Tsüngrem aser nisung tsüngdang tai menaa pei senti vote sen yong ayokba dang nungibo ochishia asenoki nübortem nungdak repringteta ayokba nungjiang shitakba tepela, akhüm aser tajangzük angutsüsa takoktsü lenmang ana nung lir. Asenok rongnunga tia majungtsü purtemi election kodang arudir jet ta vote aser yi ayoktsü dang temulungi arur. Anaji dang masü saka tanü asüngbo drugs dena ayoker. Aji oda, kar asoshibo election mapang ya vote, yi aser drugs ayokba mapang lir. Iba jagi election agia government tasen ka mekümtet dang yongi pei lima aser nübortem raksatsür atar. Aji oda, temulung ashitsüka, nisung karbo taoba election-tem nung vote ayokba sen agibaba agi azümasen kümer tesensakba tia nung meshimetsür kümer election tanaben ajurur, karbo election nung yi jembaba aser drug chibaba meindoktet item mozü lartem kümer tang election ajurur. Item tiaji kodang bilemdangdir, nübortem nungdak ochishia ayoktsü melen pei tajangzük asoshi dang bilema ozüngi memelaba chiyongtsütem ayokba ajanga lir. Item purtem tarutsü tiaji tajidaksüka, ashiko vote, yi aser drugs ayokba nungi anguba tajangzük dangbo tangar taküm raksatsüba atakatemang tuluba asenoki aser asen chirnurtemi ajurutsüa akok. Itemji bilemdanga, kechi Tsüngremi mulunger aser alima ozüngia melar, item mapatemji asenoki inyaktüla. Aji oda, atakatem angutsüsa vote, yi aser drugs ayoktsü agibo ochishia election nung nungdakba jangotsü aser süngotsü ayoktsü sentong yanglura, item mapatem nung jagibo teti asoshi temoatsü ronem keta asenoki tajangzük ngutettsü. Tatsüba agi, tang election mapang ak 100 bener arua ayok nung koda? Mamatzü,shini aser süngo seret meyi kaka ayok nunga koda? Iba tangatetba nung election mapang nunga asenok tajangzük aser temoatsü angutsüsa tejangrar aser teinyaktettsü purtemibo kechi ayoktsüla aser kechibo mayoktsüla, itemji bendangteta asenoki inyaktetra, shitakba election ya democracy ajanga nübortem asoshi temoatsü bener arutsüba mapang tajung ka asütsü. Election nung tokteper shia ozüng alema masüyonga sen lakh ishikabosa endoktsüsa nungdak adoker. Item senji pei akaba nungi endoktsüa akok mesüra teyaritepertemi tenla bendentsüba asütsüa akok. Koba sen südir süang, item senji tanga state leni moi asenok keti arutsüsa asenoki election nung nungdakbatem repringteta ayoktsü merangtsüla. Aji oda, aika atema Christmas ama benjong ya sen endokba masü sen aaba benjong lir. Kasaji, asenok asoshi election yaa tim lenmang nungi sen aaba mapang ka südaktsüdi.

OLEMSABANG

KECHIBA NAGA NUNGER MLA AKÜM TSÜ YAMAI RAKTEBER ?????

- Toshi Ozüküm, Kohima Town

Naga lima state balaka 1963 nung aküm. 1964 nung mezüngbuba general election agi. Iba mapang NNO party ajanga government kümtet ta tamburtemi ashi.

Joko Naga nung 14 ben beuba General Election anogo ishika tsüngda nung agitsü lir. 2018 tashi nung political party asem NPF, BJP, party tasen NDPP aser Independent tang liasü. Aji saka takumbo Nagaland nung mangashitangba political party jendi senoka aitogo. Iba yagi Naga nung MLA kümner jendi kümogo ta ajiteter. February 6 tashinung nisung 117 nomination file suogo ta osang ajanga angashir

Kechiba yamai rakteber ta shisadang nung Nalanand nung business tajungtibaji MLA raktepba ya lir ta ajitetogo. 2013 nungi balaka MLA alizüker Karizanga forest nung ken ayu. Sovima nung ken ayu. Hotel aser Resort balala nung ayubato asenoki bilemteter. 2022 küm aya marem MLA 21 NPF nungi NDDP nung aden. Ita ishika amshir takumbo parnok 12 NDDP nungi merebdokogo Tawato ni whatsapp ka nung Junjabi nung telok kadi MLA sale purchase video ka nguogo. Nenok aiekati ibato nguogo ta amanger.

Election mapang yi, sen aser nuktapangta temenen ya asen Aolima nungi tenzük ta ni bilemer. PROXY 30 ben inoktsürji asen Aor lir. Election mapang anogo ka nung 15 ben chi chiyongbaji asen Aor lir. Ya numatangtsü mapa mau. Arogo tenzükuri anir compassing jajatang tekülen tenlaki azüngazünga yutusba ya Naga nung asoshi numatangtsü masü.

State ngur küm 60 tsüngda nung MLA melenteba yimsu asüadang Naga lima terenlok mapa kechisa inyaktet asenoki angur. Lemang MAJUNG, TAJEMTSÜ TZÜ BERIA BENER MARUTETER. MILEN TESANGWA (ELECTICITY) beria maka. Sorkar hospital nung mozüjang kata maka. Ya koda asütsü?

Küm pongu nungi metsü tashi MLA /Minister inyaktang parnok ajak crorerpati kümogo ta osang kaket nung sangdonogo. Item sen kong nungi angu? Tawato ni Planning and coordination department nung tular katang Local Area Development Programme indng asüngdang. Pai küm ka nung MLA ka nem se crorer ka ser lakh enem (Rs 1.50 crorer) lezmüksür ta ashi. Item swen jagi MLA shibaisa ochishia pei area development nung sen kwi indok asenoki asüngdangtsü tim.

2022 Covid 19 pandemic mapang Rs 326.41 asemben aruogo. Iba mapang Arogotemiang shirnger yariba osang angashiogo. Sorkari iba sento koda amshi public dang sangdongtsüla. Paper Mill atema Rs 100 crorer arubato kechi nung sama. Paper Mill nung inyaktet aya agi tasür tang lir saka MLA kechi ajia liaau? Amangbapurtemi Nagaland nung yi mayoktsü khangzuka ayunung MLAtemi yi ya ayoktsü aser iba senji parnok amshitsü ta sangdongbato taaktsü mapa masüna? Central sorkari kakütshirtem nem scholarhip agütsütsü beener yoknung ita aieka miima yur kaketshirtem timtemdaksübatokoda?

Tawato ni whatsapp ka nung adinukati yamai ashi. Election mapang MLA aser Ministertemi sen alemba ya küm pongunung parnok public sen auyatena ayuba nungi teraka ajpteter asenok sen asenok nem lema agütsür. Anungji iba sen agiba ya temenen sen masü Asenok sen alemertang. Anungji MLA aser Minister tejentem nungibo sn meshiang saka candidate tasentem nungibi sen mehia tagi ta pai sangdongbato asenok ajaki nguogo.

Item khuli aieka ajanga Naga nung paikati MLA akümtsü raktepba ya alima renoktsü atema masü saka crorerpati akümsu raakteber ta angateter. Parnok tekolok nung aliba idea ajakto sen meimba temenen agi mokbanger parnok tekolok nung kecha mali tazüngla ta angateter. Clean Election compaign nung yakbangpur karbo tesuleni atsüngzuka aoba osang angashir. Ya koda asütsü?

Yanglushidi Sensaksem Sabang nung zülurtem kari zülubato bilemteti. Iba ocet nungto yamai shisema lir. 2023 General Election mapang sannukertem, Laishirtem aser Arogo tenzükertem lemsar polling day nung polling station ajak nung polling madem tashi proxy votemagütsütsü saka one man one vote ochishia agütsütsü atema sarasadema atasü ta ashibato mapang gi tonga aruogo. Iba to mamali.

Nagaland ya North East India nung most corrupted State ta jungkai adokogo. Naga nung Christian aser Mizo nung Christian khi balala ta tsümartemi ashi. Parnok ochishir christiantem saka Naga nung ya ochi mashi christiantem aieka lir ta ashir. Laishiba Mika tapu 6: 12 nung yamai shia lir "Nenok takartem teka yitepba agi unga lir. aser yangji nisungtemi teyazü jembiraser parnok bang nung temeli tekolakoktsür lir. Ya arokaroka shisadangdi.

Kechiba asen lima yamai raksatet ta shisadangnung ya amangpapurtemi tai sarasademer asü ta angateter. Kechiaser Minister aser MLAtemi public sen auyadema yur tenla tululu agütsüba pelashishia agizüker aser parnok temenen ajak nangzuka saraaemtsür. Iba jagi panok temolung tulu küm temenen rongsen amongteter. Yi ayoker aser drus ayokertem aema tai nangzuka sarasademtsür saka parnokibo item temenentem nangzü mesarasademmer. Iba jagi asen lima nung corruption ya manener ta bilemer.

India nung BJP nung adenerntem RSS fundamentaalisremi Khristiantem rishikangshir. Nagaland nung Khristian saka Khrista makartemi public sen crorer crorer auyadema ayur.

Anungji chichiba Khristiantemi yamai sarasademtsü ni ayongzük. Yi aser drugs ayokertem business ajak amajok kümdakjang. Yi ajemer tebang nung yiji tasen küm tebu mejemdakjang aser drugs ajakji tebang nung takhu kümdakjang. Public sen auyartem teka ajakji atentena kümdakjang. Nagaland nunv pei temeneni pei bushitetdakjang ta sarasademdi.

Mokokchung Town nung Arogo 127 nungi sannukertem aieka adenahia February 8 anogo nung ayimtena sarasademba asangsang nung adalokdakjang ta iba ocet azünger ajak ayongzük.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mkg.nung Election merüka agitetsü asoshi sarasadema yimyim ayima jaja



Aruya aliba state general election mechi Ao Baptist Pastors Fellowship, Mokokchung ajanga District Administration aser District Election Officer, Mokokchung den lungjemer Clean Election Prayer Rally ka February 7, 2023 nü ayongzüka liasü. Iba sarasadem sentong ya anepdang 8:00 ako nungi 11:00 ako tashi Mokokchung jila kübok Imkongmeren Sports Complex nungi Police point Main Town tashinung agia liasü.

Mokokchung, Tsüklai/February 07 (TYO): Ao Baptist Pastors Fellowship-i ayongzüka, election ajanga alima teraksa bener arutsüba anema noktakba tamaitüsü aser Election merük merüka agitsü asoshi sarasadema yimyim ayima jajaba (Clean Election Prayer Rally) sentong ka Mokokchung District Administration den semtepa

takom ngua kaogo. Tanü iba sentong ya Imkongmeren Sports Complex nung Mokokchung Deputy Commissioner Shashank Pratap Singh IAS-i wako salatusü aser ABAM Executive Secretary Rev. Dr. Prof. Mar Pongener-i "Nagaland For Christ" ta asüba onük jembia sarasademer tenzük. Lenjem balala nung

Tsüngrem tenzükertemi Tsüngrem o zünga sarasadem mapang tajung agia liasü aser Mokokchung Town Police Point nung tembanga liasü. Iba rally nung Jila aser yimsüng balala nungi sannüker aser arogo tenzükertem aruba adenba den ano temelunger nübur aika dena kanga dang takokma nung agiogo.

Pakistan nung Khristan tsür ka dak acid inloktsü

Lahore, Tsüklai/February 07 (Agencies): Bodhbarnü Karachi, Pakistan nung arishi küm 19 tain Khristan tsür kati Muslim nunger ka den tesendaktep yanglua Islam dangi meyiptsü ajungshiba memolungba yong acid inloktsü, ta osang ajanga ashi. Sunita Masih, shiba tsürabur asüba sülen la teyi den alir aser iba anepdang Karachi kübok Kala Pull area nung Masoom Shah Colony nung lar kidang nungi mapa inyaki ao. Cantt station nung bus ka nungi aluba sülen lar kidanger Muslim nunger Kamran Allah Bux-i la dak acid inloktsü aser jena ao, ta la tebotanubo John Masih-i ashi. "Sunita ya arishi küm 19 dang, saka tangbo Kamran-i la temang nung teti asoshi tarak kettsüogo. Pai mapa tamajung inyaktüba yong pa aijaka Sunita ya akhi ama melitetsü. Acid agi yirutsür alirtem asen nüburi koma amshir asenok ajaki meteta lir," ta tebotanuboi ashi. Iba lendong nung Sunita Masih temang shilem 20 acid agi rongsa. "Kamran-i kü dak acid inloktsüli kü tenük, tejak, teka aser tetsüng arong tenzük. Tashiba ni mokokteti lenmang nung ni lao," ta lai police dang mozüki yipten nungi ashi. Bux-i la dang tena medemtsü ajungshia liasü, ta John Masih-i ashi. "La Khristan yimsü yutsür Muslim akumba sülen la den kibong akumtsü ajungshia liasü, saka lai iba takhangba menanzük," ta Masih-i ashi. "Karman-i yamaji merenshiba otsü Sunita-i lar adianutem dang ashi aser par tsürabor dang yamaji meinyaktsü ajungshia

liasü, saka kecha mesütem." Merenshiba anendaktsütsü mechi kinunger temi police nemo sang agütsü, saka parnoki kecha meinyak. Parnoki yamaji merangba ajak nung tamakok ajuruba sülen Sunita teyi kinungboi Bux dak azük, saka ajiakia pa temolung memelenshi, ta John Masih-isa ashi. Sunita Masih ya Salvation Army church nung züngsem ka lir aser la tejak aser temang rongsatsüba atema kinunger temi obendang bushir. Frere Police Station indang Assistant Sub-Inspector Sagheer Ahmed-i ashiba agi, temang rongsaba oset agi yirutsüba (Pakistan Penal Code indang Section 336-B) mechi Bux anema ken o ka benoka lir aser pa pua lir. "Pa ananü onok kabu nung ayutsü court nungi temelaba angu aser iba mapang pai mapa tamajung inyakba nangzük," ta Ahmed-i Morning Star News dang ashi. "Pai Sunita meima akum aser kibong akumtsü asüngdangba magizükba mechi la dak acid inloktsü ta Kamran-i nangzük." Pakistan nung kin tila nungi nüburtem dak densema tetesürtem anema mapa tamajung inyakba otsü lir. Acid lendong ya tetsür-tebur telemsa nung ajemdaker inyakba mapa tamajung ka lir, kong temang raksatsütsü mesüra tepsettsü tebilemba nung temang shi rongsaba mozü inloktsür. Tayang kepzüka timba iba ama mapa ya aiben tetsür dak inyaker. Karachi nung talisa acid agi timtem agütsüba ya tawa timba akumer, aser taoba küm October ita nungi iba ama lendong terben

dak tali ataloka arur. Tamangba yimsü tsütsü telok tilaba, talisa Khristan aser Hindu nunger amala kin nungi tetsürtemi iba amala timtem ya tali ajurur. Taoba mapang ozüng yanglur aser Lahore nung amenoka aliba Center for Law and Justice nung executive director Mary James Gill-i ashiba agi, Pakistan nung tashiyim amshia tamangba yimsü melendaktsüba otsü mali ta Federal Ministry for Religious Affairs and Interfaith Harmony ajanga ashir saka anogoshi Khristan aser Hindu tsür lendong timtem ajuruba magizüker. "Kin tilatem nungi tetsürtem anogoshi ama Muslim nunger teburtemi merenshir, saka parnoki mepishiba mangashi yutsür. Iba Islamic republic nung item kin tila nungi tetsürtem takum aser tamang kumzüka ayutsü shir mapa?" ta Gill-i asüngdang. Lokti tentet balala aser activist temi kanga merangaka Pakistan nung acid agi yirutsüba tali ang akumer aser 2007 aser 2022 tsüngta iba lendong ya 1,500 jungnüa ataloka liasü. Item lendong timtem ajurua aliba tetsürtem takum ya timtem agi sünger tanen makai senzüka amshir. Arogo lenirtem aser activist temi sorkar dang Pakistan nung aliba tetsür ajunga kumzüka ayutsü asoshi mera agitsü ajungshir. Open Doors' ajanga alima nung Khristan ka ama alitsü tasaktiba linüktem asadangba 2023 World Watch List nung Pakistan ya jenjang tenet buba nung lir, koba taoba küm jenjang ti buba nung liasü.

ANOGO ABEN TSÜNGREM DEN

Sarasademi Tsüngremer nükjidong metetter

"Aser anepdang sangwatsü talangka lia, Pa shishir, azüngmeyakdak kati aenshia ao, aser yangji sarasadem."

Mk. 1:35

Yisu sarasadem dak anepungi sarasadem dak angutsü ta nütsüng ajaki metetta liasü. Kodang parnoki Pa nungdaker parnoki sarasademdaki ao. Kodang Yihudai Yisu ashioksü, pai tsükchirtem sarasademdaki anir ao. Mapang ajak nung Kibuba Yisui tongtipang telemtetba agitsü asüngdang, pai sarasadem. Kodang pa dang Tebui mulungba ama masü alimai mulungba ama inyaktsü atitang, pai sarasadem (Mtt. 4). Kodang pa nütsüngtem shimtsü mapang aru, Pai aonung tepiyong sarasadem (Lk. 6:12). Tsüngren Chiri Tebui mulungba metettsü asoshi aonung tepiyong sarasadem asü süra, asenoki Tebui mulungba metettsü asoshi mapang kobika agitsü? Yisu teti teloki nungbanga ali nung pa Tebui jembiba tejangja angashitsü asoshi azüngmeyakdak ka nüngdak ta Pai metetta liasü. Aikati Pa tebilemba melenshidaktsütsü meranga liasü. Pa nütsüngtemi Pa lokti alidaki odaktsünü (Mk. 1:37). Lokti Pa chuba kümdaktsünü (Yn.6:15). Satani pa den hai-aura kadaktsünü (Matt. 4:3, 6,9). Yisui pa tenyaba mapaji telok atsüa arutsüba masü, saka pa Tebu dang tashi angaa alitsüba ta metetta liasü. Sarasademji Yisu tenzükba mapa asoshi tongtipang liasü (Lk.6:12). Sayatenya dang tama sarasademji aor (Yn.11:42-43); sarasademi koda masüba mapang tasü itdaksür (Lk. 9:28-31); sarasademi Pa kangki atutsü tasü itdaksü (Lk. 22:41-42); timtem liaka sarasademi Pa idakji lidaktsü (Lk. 23:46). Kibuba tatishitsü Tsüngrem den liang, aser ne taküm nükjitongtem Pa nem metetdakang.

Ghana nunger football asayar Christian Atsu takum liasü



Istanbul, Tsüklai/February 07 (Agencies): Turkey nung menoknok anoka ki-o-jen agi nembanga alidak Ghana nunger football asayar Christian Atsu takum ngutet, ta pa asayaba football club indang tatong tiri ashi. Atsu ya Hatayspor asoshi asayar aser menoknok magnitude 7.8 anokba sülen Turkey indang Hatay province nung samaogo ta osang prokshi. Hombarnü iba menoknok yagi Turkey aser Syria nung nisung 5,000 dak tema takum samatsüogo. "Christian Atsu ya yirur atsütet. Tia maka asen sporting director Taner Savut tang tashi nembanga lir," ta club indang tatong tir Mustafa Ozak-i Mongulbarnü ashi. Hatay province nung ki-o-jen 1,500 shi raksaogo, ta ketdangsür temi ashir. Arishi küm 31 tain Atsu ya English Premier League nung Newcastle United aser Everton nung Chelsea nungi loan nung asaya liasü aser September ita Hatayspor dangi ao. Deobarnü Kasimpasa den asayadang pai goal ka agütsüteta takok ngur ghonda ishika lir bendanga agütsür Khrista dak amanger Christian Atsu-i iba lendong ya ajurua liasü. Iba menoknok ya Turkey

southeast tsütsü Hombarnep 4:17 ako meta (par mapang) anoka liasü. Atsu samaba osang angashia taoba Ghana tir John Dramani Mahama densema pa busemer aikati pa atema sarasademtsütsü sangdonga liasü. "Asenoki asen adianu Christian Atsu asoshi aser par club director asoshi maneni sarasademtsüti. Tsüngremi parnok takum kumzügang ta maneni sarasademti," ta Mahama-i Hombarnep Twitter nung sangdong ka agütsü. Atsu ya UK nung aliba Hillsong Church indang Newcastle campus nung züngsem ka liasü. Taoba mapang pai Ghana Sports Online den sensaksem ka alidang pai Tsüngrem dak tamang akaba ajanga pa takum yanglushiba indang shia liasü. "Asen takum tejakleni aoba nung yaritsü atema Tsüngremi nisung ajurudaktsür. Ibaji küdak atalok. Ni tejakleni aoba nung yaritsü asoshi kü takumi nisung arudakjang ta ni Tsüngrem dang sarasadema liasü aser aji küdak atalok. Tensa tamajungtiba mapang nunga ni yaritsü merangba nisung tajung küden lir," ta pai shia liasü. Adianu ter rongnung pa ka liasü aser lanuwa kanga timtema intet, saka pa arishi küm 16 ajungdangbo Khristan ka ama alitsü angazüker liasü. "Mapang ka-ka ni tekülem kidangi aotsü kanga tasak liasü. Saka arishi küm 16 nungi ni tain ka ama bilem. Ibai tekülem kidangi aoba kisüng masü saka takum yimya nunga. Nai dangar amshiba, nai dangar yariba, nü takum aliba yimyatem... Yisu Khrista takum yimyatem nai amshiba," ta pai ashi.



Kenya yimtiba, Nairobi tezülen Kibera slum nung kitsük-kirong lendong ataloka aliba anasa nübürtem adenshia aliba noksa nung angur. Kenya nung tepetzük jenjang nung alirtem aliba tesem tulutiba nung iba mi ajanga ki noklang aika arong, saka tang tashi asü-amaba osangbo mali.

Turkey, Syria menoknok nung asür nisung 5,000 alemer

Istanbul, Tsüklai/February 07 (Agencies): Menoknok tesashi anaben southeast Turkey aser northern Syria nung anoka nisung 5,000 dak tema takum samaja ki-o-jen raksatsür Turkey Tir Recep Tayyip Erdogan-i anogo tenet linük nung mangyimtsü sangdong aser Syria-i United Nations dang teyari meshir.

Hombarnep menoknok magnitude 7.8 anokba sülen ano mapang tatsüka lir magnitude 7.6 anokba nung asür ya ano alitsü, kechiaser Syria nung küm 12 tashi civil war aser refugee tebilemtsü kübok timtema arur aliba region nung ki-o-jen teraksa yapoka takum alirtem bushiba mapang lir.

Ki chirepa alidak nisung takum tali ngutettsü temila nung tekumzükör temi aonung tepiyong aser Mongulbarnepe tashi jana yapoka repringa liasü aser jana agi nangbanga aliba telung nungi kari teyari meshia jepa liasü.

Turkey nung iba menoknok agi asür nisung 3,549 jungogo, ta Turkey Tir Recep Tayyip Erdogan-i Mongulbarnepe ashi.

Turkey indang Disaster and Emergency Management Authority (AFAD) nungi ketdangsür Orhan Tatar-i Mongulbarnepe ashiba agi, nisung 20,426 yirua lir. Ki 5,700 dak tema raksa, ta Tatar-i ashi.

Syria nung nisung 1,602 takum samaogo aser 3,500 shi yirua lir, ta Ministry of Health aser White Helmets rescue organisation ajanga ashi.

Region nung asükwa den rer tsükba ajanga yirur aser talidak ki maka alirtem nem timtem tali ang agütsür. Menoknok agi kongshir alidak ki laoba aser lenmang raksar aliba ajanga takum alirtem bushitettsü aser teyari agütsütsü nung tetsükdaksü ajurur.

Southern Turkey nung yimti ter tashi 'disaster area' sangdongogo. Yangji tzüngsang-mopung kanga

temokong lir, anungji teyari agütsütsü merangba nung tetsükdaksü ajuru aser anogo tzüngsang tamajungba agi kongshitsü imlar. Tesem aika nung electricity supply aser natural gas mangur aser sorkari service anaprong agütsütsü meranger.

Hombarnü region nung menoknok maneni anoka liasü.

Mezüng anokba menoknok ya magnitude 7.8 liasü aser ghonda ishika lir tanabuba menoknok magnitude 7.6 anok, ta US Geological Survey ajanga ashi. Menoknok tanabuba anokdang Turkey kübok Sanliurfa yimti nung nisung aliba apartment building tuluka lenmang nung aoyi adoka laoa liasü.

Province ter nung nisung 7,800 dak tema kumzükogo, ta Tatar-i ashi.

Northern Syria aser southern Turkey nung mozüki balala lapoka aliba Syrian American Medical Society ajanga sangdong ka nung ashiba agi, parnoki lapoka aliba mozüki tem kima tashinung yirur alirtem sünga adenshia lir.

Linük balalai Turkey aser Syria nem yimya balala nungi teyari agütsür.

King Abdullah II totuyuba nung Jordan-i Syria aser Turkey dangi emergency aid yoker aser Egypt-ia Turkey nem teyari agütsütsü nangzükogo. Sen agi anünga aliba Lebanon-ia Turkey dangi Red Cross aser Civil Defence first responder aser firefighter tem yoker.

European Union ajanga search and rescue team tem anidena yokogo aser parnok indang Copernicus satellite system activate süa emergency mapping services agütsür. EU nung züngsem linük 13 dak temai teyari agütsür. United Kingdom aser United States-ia Syria dangi teyari yoktsü renema lir ta ashi.

Germany indang foreign ministry sangdong ka nung,

emergency generator, süki, tapentsü sü aser water treatment equipment tem agütsütsü renemer, ta shia liasü.

US-i NATO züngsem Turkey nem tekeratiba nung teyari agütsütsü osang agiteper.

Russia indang Emergencies Ministry nungi rescue team tem Syria-i aotsü renemshir, kong Russian mitkar yoka lir aser nisung 300 aliba unit ter yoka jana müreker aser takum alirtem bushir.

Burkina Faso nung Nigeria nunger temeshi aine aoer 15 tepset

Ouagadougou, Tsüklai/February 7 (Agencies): Nigeria nungi Muslim nunger temeshi aine aoer 15 Senegal-i oya aliba mapang Burkina Faso nung telungpurtemi tepsetogo. Temeshi ainer aoertem mena aliba bus telungpurtemi amakba sülen tepseta liasü, ta Nigeria tir office sangdong ka ajanga Hombarnü metetdaksü.

"Tir Muhammadu Buhari-iba lendong atalokba indang osang angazükogo," ta State House-i ashi, ajisüaka iba tatalokba indang osang tejangja magütsü.

Nigeria tir otongdari Reuters dang ashiba agi, tang tashi nung iba lendong nung asür nisung 15 lir.

Senegalese religious order sangdong ka ajanga, mejangjaba nisungtemi Bodhbarnü bus convoy ka amak aser passenger 18 tepseta liasü.

Temeshi aine aoertem ya Senegal nung tamangba yimsü sentong nung adentsü atema

TARGET NPSC 2023

NEXT BATCH AFTER ELECTION - 6TH MARCH

PRELIMS

PREPARATION

MAINS

PREPARATION

INTERVIEW

PREPARATION

WITH
NSSB

QUALITY TEACHING

QUALITY MATERIALS

QUALITY TEST SERIES

QUALITY PREPARATION

RS. 45,000/- ONLY JOIN TODAY

TARGET UPSC 2024

GS FOUNDATION | OPTIONAL PSIR | HISTORY

YES, YOU CAN BECOME THE NEXT

IAS

NCS

GIRLS PG IN CAMPUS

BOYS PG IN CAMPUS

CALL NOW @7005114715

ADMISSION OPEN

NPSC PREPARATION 2.0

Niger aser Nigeria nungi oya aliba mapa iba lendong atalok. Parnok senzüba lenmang ya northern Burkina Faso aser central Mali nung mepetmesü tulu adoker aliba tesem ajanga süier.

"Iba tatalokba nung passenger 18 taküm sama aser lendong nungi jenbortem timba parnoki bena alibatem auyar odaktsü," ta Kaolack nung Medina Baye Mosque sangdong ka ajanga Honibarnü metetdaksü.

Nigeria tir-i ashiba agi, parnoki Burkinabe ketdangsürtem den tongtepratepdar aser iba tatalokba dak sendakba nung parnoki ken o bushisüngdanga agiba osang atadar.

Burkina Faso indang foreign affairs minister Olivia Rouamba-i Nigeria ambassador den Hombarnü ajurutepa iba tatalokba indang sensaksemogo.

"Tang tashi nungbo kuli tejangja agütsütsü atema osang peria bendena mali," ta senden

amenba sülen Rouamba-i ashi. Laisa, ketdangsürtemi linük anütoktiplen senzüsenspong masütsü atema tetuyuba agütsüogo, kechiyong iba tesem nung lendong ajurutsü ana nung lir.

Burkina Faso pur tang al-Qaeda aser ISIL (ISIS) den sendaktepa aliba telungpurtem den raraba mapang ka lir, koba 2015 küm nungi tenzüka kidanger linük Mali nungi prokshia aoba lir.

Telungpurtem ya Burkina Faso, Mali aser Niger arrtsülen inyaksangshir aser alima kintem balalai parnok aziüktsü merangaka tang tashi jenjang tapet magiteti arudar.

Jila, yimtsüng, army post aser United Nations peacekeepers tem telungpurtemi mapang shia amakba ajanga nisung meyrejang aika taküm samaogo aser nisung million ana shi pei talidak toktsür jena aoba den nübürtem chiyongsü agi kanga anüngba ajanga kanga kangshitepba mapang ka lir.

Berlin nung Turkey asoshi teyari bendentsüba tesem ka nung nisungtemi osettsüset bendenba noksa nung angur. Southern Turkey aser northern Syria nung Hombarnü monoknok tesashi anaben anokba sülen Berlin nung alir Turkey nungertemi teyari osettsüset bendentsü asoshi yangji mucis school ka sünga adenshia liasü.

Frolic Cup: MVYO aser Amigos FC na final asayatsü



UFC nungi asayar Tsovi Vasa aser MVYO nungi asayar Lhangphong na ball raktepba noksa nung angur.

Dimapur, Tsüklai/February 7 (TYO): Frolic Cup koba tang Medziphema nung tang tasayadak lir iba asayamung nung Mongolbarnü semifinal asaya Amigos FC aser Medziphema Village Youth Org. nati koka final-i iogo.

Iba asayamung ya Frolic Club-i ayongzüka küm ana nung ken asaya arudar.

Mongolbarnü mezüngbuba semifinal Amigos FC aser Fury FC Molvom na asaya liasü. Asaya tetenzük nungi tatem tashi team ana tsünga midfield amokbanger asayatsü atema kanga toktepa asaya liasü.

Asaya nung mezüngbuba goal ya Amigos FC atema Menguzelie-i minute 13buba nung idakja liasü. Asaya tanabuba shilem tenzüker minute 57buba nung Nyithong-i par telok atema tanabuba goal idakja liasü.

Fury FC puria goal idaktsüsü asoshi maongka nguteta liasü saka parnoki goal magütsütet. Telok ana tsünga kanga toktepa asayaba sülen Rhitso-i Amigos FC atema goal tasembuba idakja parnoki iba asaya goal 3-0 agi ayong ayonga koka liasü.

Mongolbarnü tanabuba semifinal asaya MVYO aser United Falcon Club na asaya liasü. Iba asaya ya MVYO-i goal 3-1 agi kokogo.

Asaya nung mezüngbuba goal ya MVYO atema Thejasetuo-i minute 9buba nung idaktsü. Midfield nung ball kanga junga azioka benshiaka UFC defence aser keeper-i kanga ajanga nokdakba ajanga MVYO attacker temi goal midaktsüteti liasü.

Asaya tanabuba shilem nung team anaprongla nung goal keeper kanga mazüngi asaya

liasü. Telok ana tsünga kanga toktepa asayaba sülen Avika-i minute 64buba nung MVYO atema tanabuba goal idakja parnok goal 2 agi tejakdang aküm. Iba sülen maneni Thejasetuo-i minute 76buba nung MVYO atema tasembuba goal idaktsü. UFC atema goal ka ya Nourhelhoulie-i minute 85buba nung idakja liasü.

Amigos FC taküm agi asembenbuba iba asayamung akoktsü asoshi asayadar aser kasa mapang nung MVYO pur iba asayamung nung Quarter Final adena masayadangi aliba takümbo final tongtetogo aser asayamung akoktsü atema temulungtetba tulu nung lir.

Final asaya:

Amigos FC Vs Medziphema village youth org.

Anogo : February 8

Mapang : 01:00 PM.

Local Ground Medziphema

Manraj & Rakshitha lenisüba nung Dutch aser German Junior asayamung asayatsü

Tsüklai/February 7, 2023 (Agencies): India nunger tebur kija asayatem rongungi jenjang 33buba nung aliba asayar Manraj Singh aser tetsür kija asayar Rakshitha Sree S na lenisüba nung Dutch Junior International 2023 aser German Junior 2023 asayamung nung India nunger asayatem asayatsü. Iba asayamung ana atema asaya 19 shimogo.

Badminton Association of India-i, taküm küm atema mezüngbuba Junior International Grand Prix asayamung ana asoshi asayatem shimtsü atema anogo pezü tashi selection trial agiogo. Selection trials ya Greater Noida nung January 24 nungi 27 tashi agia liasü.

Dutch Junior International 2023 aser German Junior 2023 asayamung ya March 1 nungi 12 tashi asayatsü.

Tebur kija asaya nung Manraj Singh temaba jenjang

nung lir aser pa sülen Ayush Shetty, Lokesh Reddy K. aser Gagan nung lir.

Kasa mapang nung tetsür kija asaya nung tawa kanga kara renloka oya aliba asaya Rakshitha Sree S-i anir tetsür asayatem asayatsü, kong India no. 25 Shreya Lele, Jiya Rawat aser India no. 24 Aalisha Naik nunger densema lir.

Asayamungtem nung Tebur tarep asaya Bhavya Chhabra aser Param Choudhary nati anir asayatsü aser tena den Divyam Arora aser Mayank Rana na team nung tanabuba tarep asütsü.

Tetsür tarep asaya nung Vennala K. aser Shreyanshi Valishetty na mezüngbuba team asütsü aser Vaishnavi Khadkekar o Sania Sikkandar na tanabuba team asütsü. Vennala aser Shreyanshi nabo tawa Badminton Asia Junior Championships 2022 nung India tenüng nungi asayaogo.

Tarep temeyoktep asaya nung Arulmurugan R o Srinidhi N. aser Sathwik Reddy K.o Vaishnavi Khadkekar nunger asayatsü.

Dutch Junior International 2023 ya March 1 nü Haarlem nung tenzüksü aser German Junior 2023 ya Berlin nung March 8 nü tenzüksü.

Indian squad:

Men's singles: Manraj Singh, Ayush Shetty, Lokesh Reddy K., Gagan

Women's singles: Rakshitha Sree S., Shreya Lele, Jiya Rawat, Aalisha Naik

Men's doubles: Bhavya Chhabra/Param Choudhary, Divyam Arora/Mayank Rana

Women's doubles: Vennala K./Shreyanshi Valishetty, Vaishnavi Khadkekar/Sania Sikkandar

Mixed doubles: Arulmurugan R./Srinidhi N., Sathwik Reddy K./Vaishnavi Khadkekar.

3rd Champions Trophy: SMCC, Brezza IX & Rabbit BCC nungeri takok angu

Dimapur, Tsüklai/February 7 (TYO): Nagamese Baptist Fellowship Sports Ministry Chumoukedima Village-i ayongzüka Chumoukedima town local ground nung tang asaya aliba 3rd Champions Trophy tananübuba mezüngbuba asaya Silver Machete Cricket Club (SMCC) aser NIT Nagaland na asaya liasü

Asaya nung Machete CC-i toss akok aser mezüng bat asütsü shimba sülen parnoki run 306 yanglu. Asaya tanabuba shilem nung NIT Nagaland-i run 44 dang yanglur asayar ajak out süatok. Iba asaya ya SMCC-i run 261 agi koka liasü.

Tanabuba asaya Brezza IX CC aser Optimus CC na asaya aser mezüng batting amenba sülen BREZZA IX CC puri run 275 yanglua liasü. Run arishiba mapang Optimus CC puri run 193 dang yangluteta run 82 agi asaya mekoki liasü.

Mongolbarnü tasembuba asaya defending champion Flying Rabbit BCC aser Royal CC na asaya liasü. Mezüng batting amenba sülen Royal CC puri run 171 yanglua liasü.

Asaya tanabuba shilem nung Flying Rabbit puri over 14.2 nung wicket 3 out ser Royal puri yanglua aliba run menepa asaya akok.

Iba asayamung ya "pursue oneness" omen nung ajemdaker February 6 nü Chumoukedima town local ground nung tenzüko.

Iba T20 asayamung lapokba sentong nung Ghaspani-1 constituency nung Congress candidate aser NPCC secretary Akavi N. Zhimomi alakteta jaoker aser Likao Murry (Registered Class-1 Contractor & Supplier) tetushi tejaoker liasü.

Asayamung nung team ajak senteper team 32-i shilem agidar.

Yashi mezüngbuba asaya Highlander CC aser Veterans CC na asaya liasü. Mezüng bat asütsü shimba sülen Highlander CC puri wicket 5 out ser run 313 yanglua liasü. Veterans CC pur run 68 dang yanglur asayar ajak out süadok.

Iba asaya ya Highlander CC puri run 244 agi akok aser run 102 yangluba atema Dildar Hussain nem man of the match award agüja liasü.

Asayamung nung team ajak senteper team 32-i shilem agidar.

Yashi mezüngbuba asaya Highlander CC aser Veterans CC na asaya liasü. Mezüng bat asütsü shimba sülen Highlander CC puri wicket 5 out ser run 313 yanglua liasü. Veterans CC pur run 68 dang yanglur asayar ajak out süadok.

Iba asaya ya Highlander CC puri run 244 agi akok aser run 102 yangluba atema Dildar Hussain nem man of the match award agüja liasü.

Asayamung nung team ajak senteper team 32-i shilem agidar.

Yashi mezüngbuba asaya Highlander CC aser Veterans CC na asaya liasü. Mezüng bat asütsü shimba sülen Highlander CC puri wicket 5 out ser run 313 yanglua liasü. Veterans CC pur run 68 dang yanglur asayar ajak out süadok.

Iba asaya ya Highlander CC puri run 244 agi akok aser run 102 yangluba atema Dildar Hussain nem man of the match award agüja liasü.

Santosh Trophy: Kerala & Goa final round mezüngbuba asaya asayatsü



Tsüklai/February 7, 2023 (Agencies): Defending champions Kerala aser Goa na Hokolbarnü Capital Football Arena nung Santosh Trophy final round mezüngbuba asaya asayatsü.

Final round tenzükbba mezüngbuba anogo Group A nungi asaya asem asayatsü. Kerala aser Goa na asayaba sülen asayamung ayongzüka asayaba state Odisha aser Maharashtra na asayatsü aser 7th Battalion Ground nung iba asayamung tiben tashi koker aliba Punjab team aser Karnataka na tasembuba asaya asayatsü.

Honibarnü Group B nung final round-i indang indanga aiba Railways aser Services na

densema team trok asayatsü. Railways aser Services aser mezüngbuba asaya Manipur aser Meghalaya na den asayatsü. Taoba küm runners-up West Bengal pur final round mezüngbuba asaya Delhi den asayatsü.

Asayatem ya Capital Football Arena, 7th Battalion Ground aser Kalinga Stadium nung asayatsü renema lir. Group asaya tatemangbuba round bo tensa apir ground asemprongla nung mapa ka nung dang asayatsü akok.

Telok anaprongla nungi temaba jenjang nung tembangba team anana knockout round (semifinal aser final) asayatsü koba Saudi Arabia nung oa asayatsü.

BILEMDANGANG

"Nai tajung ka bilemba ajanga anogo melenshitsür."